



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :



Tir Yimiyim



tiryimiyim@aolima




tir yimiyim

TAPAK 7


AAP lenir Sisodia-i bail atema mepeshiba SC-i magizük

Pakistan PM Shehbaz-i China semdang tenzüker



VOL. XXI ISSUE NO. 233 (ADOK 233) DIMAPUR RASEMNÜ (WEDNESDAY) AAMI (JUNE) 05, 2024 ₹ 5.00

Congress candidate Supongmeren Jamir-i otsü tasen ka yangluogo



Nagaland Parliamentary Constituency atema Commissioner & RO Sushil Kumar Patel-i Indian National Congress candidate S. Supongmeren Jamir nem winning certificate agütsüba angur.

Kohima, June 4, 2024 (TYO): Nagaland nung Congress-i otsü tasen ka yangluogo aser ibaji state president S. Supongmeren Jamir-i Lok Sabha menden nung takok anguba lir.

Nagaland nung MLA 60 longjemer NDPP candidate Dr. Chumben Murry nungita yari saka Congress candidate Supongmeren-i votes 50,984 agi Dr. Chumben madak takok angu.

Taküm Lok Sabha election nung Supongmeren-i votes 4,01,951, Dr. Chumben-i votes 3,50,967 aser Independent candidate Hayithung Tungoe Lotha-i votes 6,232 angu. Maneni None of the above (NOTA) votes 1,648 liasü.

2014 nungi Nagaland nung

Congress MLA ka dang mali arur aser Congress-i Lok Sabha election nung tatem sabuba takok angubaji 1999 küm K. Asungba Sangtam-i takok anguba liasü. Asungba Sangtam-i 2004 tashi MP inyak. Anungji taküm Nagaland nung Congress candidate-i takok anguba ya kanga tulu lir ta züngshir.

2019 election nung NDPP candidate Tohekho Yeptomi-i Congress candidate K. L. Chishi madak votes 13,000 tema kati takok ngua liasü.

"Nagaland nung vote enoktsürtemi Congress nem takok ngudaksüba atema kanga pelar aser Congress-i tebandang kecha melii state renloksü aser nübortem ajangzüksü asoshi

inyaktsü nangzüker" ta Supongmeren-i ashi.

"Küm 10 sülen Lok Sabha menden nung takok angur anungji nübortem atongtsü aser parnok tamang kadaktsütsü atema teinyaktsü aika lir. Nagaland nung alirtemi Congress angatetba aser takok ngudaksüba atema kanga pelar" ta pai ashi.

"Iba ya nübortem temelenshi aginüba sayuba ka lir aser Congress-i iba nüngdakba temelenshi bener arutsü atema inyaktsü" ta Supongmeren-isa ashi.

"Congress-i tebilemtsü onüktem aser nübortem democracy aginüba nung ajemdaker election atema asalentong atonga nübo ayim. Onoki election manifesto nung nangzükbatem takok ngua inyaktsü" ta paisa shisem.

"Ni takok anguba ya Nagaland nung Congress asentenshiba mapang ka asütsü kechiyong 2014 nungi Assembly nung MLA ka danga mali arur" ta pai ashi.

Supongmeren-isa AICC lenirtem Mallikarjun Kharge aser Rahul Gandhi nati pa dak tamang akaba atema pelaba metetdaksü.

Nagaland Chief Minister Neiphiu Rio, Deputy CM & BJP Legislature Party leader Yanthungo Patton aser NPF

Legislature Party leader Kuzholuzo Nienu nungeri Supongmeren Jamir nem tenüngsang agütsüogo.

"Nagaland nungi Lok Sabha menden nung takok anguba atema S. Supongmeren Jamir nem tenüngsang agütsür. Nagaland nung alirtemi parnok teshimtet nübo asütsü atema na shimteto. Nübortem tenzüksü tebilemtsü khuret bener inyaka aotsü asoshi moatsür" ta CM Rio-i metetdaksü.

"S Supongmeren Jamir-i Nagaland nung Lok Sabha menden nung takok anguba atema tenüngsang agütsür. State aser linük nübortem tenzüksü mission asoshi moatsür" ta Y Patton-ia ashi.

"S. Supongmeren-i Nagaland menden nung takok anguba atema tenüngsang agütsür. Naga nunger onük aser taginübatem asoshi jembia aotsü kümsük moatsür" ta Nienu-ia ashi.

Supongmeren Jamir ya October 25, 1963 nü aso. Pa ya Longsa nunger asür Shilumangyang aser Alemsola na jabaso lir aser pa 1979 küm Ongpangkong High School Mokokchung nungi matriculate asü.

Iba sülen 1987 küm pa Fazl Ali College, Mokokchung nungi graduate asü aser 1993 küm Law

College Mokokchung nungi LLB angu.

Supongmeren-i 1982 küm Congress Party nung züngsem aküm aser 1982-83 mapang President, Youth Congress (I) Longsa inyak. Iba sülen 1983-84 tashi pai 25 Mongoya Assembly Constituency Youth Congress (I)(ACYC) nung president aser 1983-89 tashi NSUI(National students' Union of India) president inyaka liasü.

2003 küm pai assembly election nung mezüng toktepa 25th Mongoya Assembly Constituency nungi MLA aküm saka 2008 election nung pai tamakok angu.

1981- 82 mapang pai Mon District kübok Asst. Teacher, Govt. High School Buami inyak saka iba mapa toktsür Congress Party züngsem aküm.

Supongmeren-isa 1993-96 nung Power, Fisheries and Political Affairs, Nagaland Minister atema Personal Secretary inyak. Paisa 1996-2002 tashi Personal Secretary to CM Nagaland inyaka liasü.

Supongmeren Jamir-i March 17, 2002 nü Glory to India Award agizük aser iba ya Social Service atema liasü. Paisa Economic Growth and National Unity atema Friendship Forum of India Bharat Award agizükogo.

INDIA bloc takok ajanga NDA-i menden 400 alizüng metongteter

New Delhi, June 4, 2024 (Agencies): 18 buba Lok Sabha election nung BJP-i aniba NDA teloktepi imlaba ama takok menguteter kechiyong opposition INDIA bloc-i kanga dang shisa kaa raraba tanü votes azüngba ajanga angur.

Ajisüaka, tang tashi anguba results ajanga Prime Minister Narendra Modi-i kümsük tasembuba atema sorkar ketdangsüa aotsü ama ajiteter.

Taküm Lok Sabha election nung NDA-i menden 400 tema nung takok angutsü alizüng ayu saka tang tashi nung parnok menden 290 shi ka nung jenjang junga lir. Külen INDIA bloc menden 235 shi ka nung jenjang junga lir.

Tanep nungi votes azüng tenzüka sülen ghonda 13 süia arudang INDIA bloc-i menden 233 nung takok nguogo saka menden 39 agi majority mark matong. Külen, BJP-i aniba NDA-i menden 291 nung takok nguogo aser ibaji majority mark dang nungi menden 19 talila lir.

BJP-i menden 239 nung takok nguogo saka majority mark atongtsü atema menden 33 agi matonger.

Tang tashi nung INDIA bloc aser NDA nung madenba YSRCP aser Independent candidate 19-i takok ngua lir. Anungji INDIA

bloc-i sorkar akümtsü merangnura Janata Dal United, Telugu Desam Party (TDP) aser Independent candidate kar nüngdaksü. Külen, BJP-ia sorkar akümtsü atema parnok ya kechi südir süaka parnok ket nung ayutsüla.

Taküm Lok Sabha election nung Bihar Chief Minister & JDU tanishir Nitish Kumar aser Telugu Desam Party lennir N Chandrababu Naidu na 'kingmakers' kümogo.

Votes azüngtsü tenzüker ghonda 12 tashi nung Andhra Pradesh nung TDP-i Lok Sabha menden 16 nung takok nguteta lir. Bihar nunga Nitish Kumar'er JDU-i menden 12 nung takok angutsü.

Tanü nikonngang tashi nung osang tejangjaba meteta akümdang INDIA bloc lennirtemi Nitish Kumar aser Chandrababu Naidu na den sorkar külemi akümtsü atema jembishinü tenzükogo ta olulu jembiba angazükur.

Ajisüaka iba indang kuli tejangja mali aser Congress president Mallikarjun Kharge-i asüng INDIA bloc lennirtem den ajurutepa senden amentsü ta ashi.

"Onok den yaritepa teloktem aser ano onok den adentsüpur telok tasen kar den mejembi tashi

oni kecha ashitsü makok. Onok indang asalentong tang shiadokra Prime Minister Narendra Modi kanga kümdangtsü" ta Congress president Mallikarjun Kharge-i osangbener dang ashi.

BJP-i menden 370 nung takok angutsü alizüng ayu aser iba osang zülü tashi nung parnok menden 243 nung leading lir. Tetezü BJP-i 272 majority mark matonger. Tang tashi nung Congress-i menden 99 nung takok nguteta lir.

Congress President Mallikarjun Kharge-i osangbener senden ka nung election results ya Prime Minister Modi anema nübortem votes enoktsüba lir ta ashi.

Iba ya BJP atema yimtenren aser tangatetba nung tamakok tulu lir ta Kharge-isa ashi.

BJP-i state sorkar yimsü asüba Uttar Pradesh nung tamakok tulu nguogo kechiyong iba state nungi Lok Sabha menden 80 nung INDIA bloc-i menden 44 nung takok ngua odar aser BJP-i menden 35 nung dang takok ngudar. UP nung Congress-i menden 8 aser Samajwadi Party-i menden 36 nung leading lir.

West Bengal nunga votes azüngba tetenzüklenbo Trinamool Congress (TMC) aser BJP tsüngda kanga

anasatapa liasü saka züngyonga arudang Mamata Banerjee-i aniba party-i BJP ajatetogo. Tang tashi nung BJP-i menden 12 nung leading lir.

INDIA bloc-isa Maharashtra nung jenjang tajung ngutetogo aser parliamentary constituency 48 nungi 30 nung parnok leading lir. Maharashtra nung sorkar ketdangsüba BJP, Eknath Shinde'er Shiv Sena aser Ajit Pawar'er NCP teloktem menden 17 nung leading lir.

18 buba Lok Sabha Exit polls ajanga BJP-i takok tulu ngua Narendra Modi-i kümsük tasemben atema Prime Minister inyaktsü ta asadangtetba metetdaksa liasü. Ajisüaka, opposition party 40 agi akümba INDIA bloc-i sorkar akümtsü menden peria angutsü ta tamang akaba metetdaksüogo.

Tongtipang mendentem:

Uttar Pradesh kübok Amethi nung Union Minister Smriti Irani-i tamakok nguogo aser iba ya taoksatsü aketba osang ka lir, kechiyong 2019 election nung lai iba kasa menden nung Rahul Gandhi madak takok nguogo liasü.

Ano, Thiruvananthapuram nung Union Minister & BJP candidate Rajeev Chandrasekhar-i Congress Rajya Sabha MP Shashi Tharoor den toktep saka

Chandrasekhar-i tamakok anguba osang lemsatetepo.

Kerala kübok Wayanad nung Congress MP Rahul Gandhi-i CPI candidate Annie Raja den votes 3,64,422 teimba ngua takok nguogo. Iba constituency nung BJP candidate K Surendran-i votes aika mengutet. Rahul-isa Uttar Pradesh kübok Rae Bareilly nunga votes 3.9 lakh agi takok nguogo.

Varanasi nungi kümsük tasemben atema PM Modi-i takok nguogo. Tanep votes azüng tenzükdangbo Congress candidate Ajay Rai-i Modi dang nungi votes teimba ngua aru saka tatem nung Modi-i votes 1,52,513 agi takok nguogo.

Maharashtra kübok Baramati nung "Pawar" tongpang tulu ka lir. Iba constituency nung NCP (Sharad Pawar) candidate Supriya Sule-i votes 78,141 ngua leading südar. Supriya tedi kinungtsü Sunetra Pawar-i votes 68,878 nguteta lir.

Mandi nung BJP candidate Kangana Ranaut-i Congress candidate Vikramaditya Singh madak votes 74,755 agi takok nguogo.

Taoba Jammu & Kashmir Chief Minister Omar Abdullah-ia Independent candidate Abdul Rashid Sheikh tsüngdang tamakok nguogo.

Tuli Town Council nung tetsür candidate asem den tetokeper mali



Tuli Town Council nung tokteptsü asoshi Aitlenden Ward, Patizüing Ward aser Tulikong Ward nungi candidate-tem aser Watsü Mungdang lenirtem külemi tangokba noksa ka yangi angur.

Mokokchung, June/Aami 04 (TYO): Tuli Town nung Town Council election agitsü aliba nung Aitlenden Ward, Patizüing Ward aser Tulikong Ward ya Women Reservation kübok aita lir.

Item ward asemprong nungi candidate-tem Watsü

Mungdang-i külemi ajurua shisalemsatepba sentong ka agiogo. Iba sentong nung Watsü Mungdang tir Wt. Arenla Lkr, Tuli All Ward Chairman aser Tuli Watsü Telen tir-i shilem agia jembiba den candidate asemprongi parnok nükjidong lemsatepa

liasü.

Candidate-temji Aitlenden Ward nungi Shilutila, Patizüing Ward nungi Chubarenla aser Tulikong Ward nungi Temsünla ta par asem lir aser tang tashi nung par asemprong tetokteper mali (unopposed) lir.

Landmark Colony Dimapur nung Water Fountain ka semzük

Dimapur, Aami/June 04 (TYO): Dimapur kübok Landmark Colony indang traffic lemjem nung Water Fountain ka K. Hukato Chishi, IFS Member Secretary, Nagaland Pollution Board & State Nodal Officer, Clean Air Programme (NCAP) ajanga June 4, 2024 nü semzüksü.

Iba sentong nung jembidang, Dimapur nung Water Fountain alitsü ya maongka lir, koba ajanga mopung tajungba kumdaktsütsü aser nüburtem temang nung tajanzük bener arutsütsü, ta K. Hukato Chishi-i ashi.

Dimapur aser Kohima nung aliba air quality ya Central Pollution Control Board ajanga lateta yutsüba ama masü aser iba yongji Government of India, Ministry of Environment, Forest and Climate Change ajanga

Dimapur aser Kohima nung air quality tajungba kumdaktsütsü maongka agütsü, ta ashi.

Mopung majungba ajanga temang nung timtem agütsür, kechiaser mopung takong ajanga tango sashiba nung timtem adokdaktsür, ta pai ashi.

Pai nüburtem aser Landmark Colony nung alirtem dang iba tesem anepalua amshitsü ajungshi aser nisung aliba tesem nung iba ama fountain aser public gardens tali adokdaktsütsü ayongzüka liasü.

Er. Bendangtola Walling, Executive Engineer, PHED Urban Division Dimapur ajanga Technical Report agütsüba mapang, iba fountain ya Urban Division Public Health Education, Dimapur ajanga yanglu aser National Clean Air Programme (NCAP) ajanga sen agüja liasü,

ta ashi.

National Clean Air Programme (NCAP) ya yimti, regional aser national level nung air quality tajungba kumdaktsütsü mechi Ministry of Environment, Forest and Climate Change ajanga 2019 küm tenzüba lir.

Iba mapa ya 2023-2024 küm nungi sen lakh 10 indoka yanglu.

Lenmang tezülen aoyi adokba ajemdaktsütsü aser yimti tebour tajungba kumdaktsütsü nükjidong nung NCAP kübok lenmang tezülen Water Fountain ya yanglu, ta lai ashi.

Dimapur Naga Students Union (DNSU) tiri o tatsüka jembidang Dimapur nüburtem asoshi tebour tajung Water Fountain yangluba atema PHED Department dang pelaba lemsatepa liasü.

DGC nung RDC aser IQAC ajanga workshop ayongzük



Dimapur, Aami/June 04 (TYO): Dimapur Government College (DGC) indang Research and Development Cell (RDC) aser Internal Quality Assurance Cell (IQAC) ajanga June 3, 2024 nü Research Methodology and Research Publication in SCOPUS and UGC-CARE Listed Journals indang anogo ka State Level Workshop ayongzüka liasü.

Iba workshop mezüingbuba session nung shisalen sayur ya Prof. Nigamananda Das, Head, department of English, Nagaland University liasü aser pai "Research Publication in SCOPUS and UGC-CARE Listed Journals" onük nung ajemdaker research papers tajung zülua journals tajung nung

adoktsü indang jembiba liasü.

Azümesenba ajanga research papers tajung mezüluteter, ta pai ashi aser research paper ajanga shisatsü tasen adokdaktsütsü aser journal tajung nung adoktsü tsüboia malitsüla, ta ashi.

Session tanabuba nung shisalen sayur ya Dr. B V Rao, Associate Professor, department of Education, Nagaland University liasü aser pai "Key Elements in Qualitative and Quantitative Research" onük nungi jembiba liasü.

Iba mapang pai research tools balala amshia research mapa inyaktsü indang jembiba.

Session anaprong atemba sülen shilem agirtem den sensaksempa mapang agia liasü.

Iba workshop ya hybrid mode nung agia liasü, kong online aser offline ajanga nisung 102 dena liasü.

Iba sentong mezüing session nung Dr. Vinyühu Lhoungu, Assistant Professor, department of Economics & IQAC Coordinator, DGC menden liasü aser tanabuba session nung Dr. Yelhi Vero, Assistant Professor, department of Economics & Convenor of Research and Development Cell, DGC menden liasü.

Dr. A. Sentyula, Head, department of English, DGC ajanga Tsüngrem temoatsü meshia sarasadem aser Prof. Sanjay Sharma, Principal, DGC ajanga telok pela agizükba o jembiba liasü.

Nüburtem dang electricity kanga kumdanga atsüktsü ayongzüker

Dimapur, Aami/June 04

(TYO): Nüburtem asoshi rongsenketzüing tabu balala atema electricity ya tongtipang service ka lir. Tanü tendak electricity nung metaloka aliba tali akumer, aser electricity makai takum alitsü atema bilemetsüa tamakoktsü lir. Asenoki agiba aser anguba nung tawa tali akumer aser department-i tajungtiba nung service agütsütsü merangba mapang power agi kanga anüingaponger, ta Er. Y. Akito Sema, Executive Engineer, Dimapur Electrical Division ajanga sangdong ka nung ashi.

Talisa Dimapur ya state nung shishilempaba aser rongsenketzüing tsütsü tesep ka lir aser urbanisation aser

terenlokba maparena kanga kera inyaka aor. Power nüngdakba kanga sashia akumer. Iba den taküm balaka meyi nung kanga atsükba ajanga power assets aser infrastructure tali amshiba ajanga tensa tali tamajungba akumer, ta ashi.

Tesüiba anogo ishika tsüingta transformer aika raksaogo aser yinzü tokdangba ajangshia lir. Iba yongji Dimapur nung aliba nüburtem nem power supply tajungtiba nung agütsütsü mechi department ajanga nüburtem dang inyaktsü aser meinyaktsü yimya kar lemsateper ta ashi.

Electricity kanga kumdanga amshitsüla, aser mamshiba mapang mesüra menüngdakba mapang electrical appliance ajanga shibanga ayutsüla, load shedding/power cuts mapang jenjang aketba electrical oset tem shibanga ayutsüla aser mapang ka nung mesüi tetsüingta keter item electrical oset tem tsükloktsüla, ta ashi.

Na aliba anasa distribution aser transmission line süyia alidak süngdong-lidong tsüngdoktsüla aser iba ama maparen inyakdang lendong majurutsü mechi Department indang ketdangsür mesüra staff nem osang agütsütsüla, ta sangdong ajanga shi.

Lendong majurutsü mechi line anasa ki o jen yanglu metenzükdang department ketdangsür den shisa agiteptsüla aser nüburtemi ozüing alema hooking, tampering aser energy meters majangi light atsükba yimyatem mamshitsü atema Ward Chairmans/village councils aser tangatetba tajung aliba nüburtemi ajungshitsüla, ta ashi.

Mapang kasa nung high-wattage electrical appliances metsükloktsüla, kechiaser tzi atsüba pumps, deep freezers, refrigerators aser air conditioners indang compressors atemlokba mapang light current ya 2.5 nungi 3 ben agi tali atsür ta metettsüla. Anungji power supply aruli appliances ajunga kasa mapang sendaktepa lira, transformer nung load mokok akumer aser fuse rongdang aser iba yongji ano fuse yanglushir power supply agütsüba nung menur aser tanen makai overload asüba ajanga Distribution transformers raksar, ta ashi.

Iba den külemi incandescent lamps, unrated/non-star-rated appliances ama power tali agiba electrical appliances mamshitsüla aser wattage ajema atsükba, 'energy efficient 5 star-rated appliances' aser LED lamps amala amshitsüla, ta sangdong ajangasa ashi.

Mkg nung Old Age, Widow aser Disability Pensioner dang metetdaksür

Dimapur, Aami/June 04

(TYO): Mokokchung district nung National Scheme aser State Schemes kübok May 15, 2024 nungi June 4, 2024 tsüingta

Old Age, Widow aser Disability Pension magizüki alirtem tekeratiba nung District Welfare Office, Mokokchung nungi office mapang anepdang 10:00 ako nungi nikongdang 2:00 ako tsüingta arua

Maneni Active Bank Account Pension benefits alirtem dangi pei indang Bank Accounts nung tsüinglanglen agüja aliba anogo nung sen transfer sütsüigo:

1. IDBI Bank	-	29-04-2024
2. Indian Bank	-	29-04-2024
3. CBI Mokokchung	-	30-04-2024
4. Canara Bank	-	02-05-2024
5. NStCB Ltd	-	03-05-2024
6. Bank of Baroda, Ungma	-	04-05-2024
7. CBI Kubolong	-	06-05-2024
8. SBI	-	07-05-2024
9. HDFC Bank	-	15-05-2024
10. Axis Bank	-	15-05-2024

Nagaland Social Security Rules, 1998 indang Rule 12 (iii) nung senotsü ya ita asem tsüingta agütsütsü shia lir, anungji iba pension sen agütsü tenzüker ita asem sülenbo iba sen magütsütsü, ta ashi.



Mongolbarnü vote azüngba mapang Mumbai Congress pusemertem party tejakdang aliba osang angazüka pelatepba noksa nung angur.

Taoba BrahMos engineer taküm tepeyong tepuokdak ayutsü obendang agütsü

New Delhi, Aami/June 4 (Agencies): Nagpur nung okadak kati Hombarnü BrahMos Aerospace Pvt Ltd indang taoba mapang engineer Nishant Pradeepkumar Agrawal taküm tepeyong tepuokdak ayutsü atema obendanga agütsüogo, shiba Pakistan intelligence agency ISI atema itangiter mapa inyakba atema 2018 küm pua liasü. District and Additional Sessions Judge M V Deshpande-i, Agrawal-i aiblena aliba nguteta pa Code of Criminal Procedure kübok Section 235, koba Information Technology Act kübok Section 66 (f) nung aibelen atema temerenshi agütsütsü atema lir aser Official Secrets Act (OSA), 1923 kübok section balala dak ajemdaker obendang

agüja liasü. Uttar Pradesh ATS aser Military Intelligence (MI) na longjemer ken o bushisüngdanga aoba mapang senior systems engineer, Agrawal ya 2018 küm October ita tangar atema itangiter mapa inyakba atema pua liasü. BrahMos Aerospace yagi supersonic cruise missile BrahMos, design süa yaungluba den ayoktsü atema-a jenjang agir. Iba ya India indang Defence Research & Development Organisation (DRDO) aser Russia indang Military Industrial Consortium, NPO Mashinostroyeniya na longjemer inyaker. Agency tem yagi, Agrawal-i Pakistan nungi asütsü ta temulung melemi bilemba pa indang "handler" nem BrahMos

dak sendakba nung tongtibang data tem agütsü magütsü, iba indang bushisüngdanga liasü. Pa ya OSA aser IPC kübok provisions balala nung aitsüogo. Prosecution-i ashiba agi, ken o ya cyber activities ken o ka lir. Ken o bushisüngdanga mapang ATS-i ano tetsür indang profile pictures ket aliba Facebook accounts ana ngutet aser iba account ana ya-a Agrawal den sendaktepa liasü. Taoba küm April ita Bombay High Court, Nagpur bench-i Agrawal nem bail agüja liasü. Justice Anil S Kilor indang High Court bench-i ashiba agi, ken o dak sendakba nung tenük kuli agütsürtem timba kati kuli agütsütsü atema marur, aser kuli agütsür trok dang asadangogo aser kuli agütsür 11 tang tashi masadangi lir.

Israeli Embassy-i lisopurtem dang India nung tzükümtem semdangtsü ajungshi

New Delhi, Aami/June 4 (Agencies): Maldives sorkari Gaza nung rara dak sendakba nung Israel indang passport amertem linüki maitdaksütsü atema telemetba agiba sülen, Israel Embassy-i lisopurtem dang India nung tebur tajung tzükümtem semdangtsü ajungshia liasü. "Maldives-i Israel nungertem marudaksür asünung, idaki India nung tebur tajung tzükümtem kar lemsateper, kong Israel nung alima penzürtem pelashishia jaoker aser kanga junga anepalur. Linük diplomat temi semdangba tesemtem dak ajemdaker @IsraelinIndia nung

recommendation tem reprangdangang," ta embassy-i X nung lemsatep. English aser Hindi naprongla nung embassy-i Lakshadweep, Andaman & Nicobar Islands, Goa aser Kerala nung tzüküm tajungtem indang noksa pezü lemsatepa liasü. Maldives-i küm shia alima penzür million ka shi agizüker. 2023 küm Israel nung alima penzür 10,966 shi-i Maldives semdangogo aser Israel nung 15,748 shi-i linük semdangogo. Israel-i taoba küm December ita lisopurtem dang Maldives-i maotsü atema tekümdangtsü metetdakja liasü, kechiyong Hamas den rara dak

sendakba nung iba linük nung Israel anemertem tali küma liasü. 1974 küm tesendktep raksaba sülen Israel aser Muslim nungeri amokbanger aliba linük na ya diplomatic tesendaktep mali. Maldives sorkari Israel indang passport bena alirtem linüki maitdaksütsü atema telemetba agiba sülen Israel-i, bendanger passport bena alirtem densema lisopurtem dang Maldives-i maotsü ajungshiba den Maldives nung alirtem danga iba linük toktsür aotsü tetuyuba agütsüogo. Israeli Foreign Ministry-i iba tetuyuba ya Deobarnü agüja liasü.



Thiruvananthapuram kübok Panathura asetkong nung tanurtem pei tsürapurtem den school-i rong ka nung mener aoba noksa nung angur.

Kashmir nung LeT commander ka khaset

New Delhi, Aami/June 4 (Agencies): Hombarnü south Kashmir kübok Pulwama nung khatepba mapang telungpur ana khasetba nung Lashkar-e-Toiba (LeT) commander tongtibang ka densema liasü. Telungpurtem mungzüka aliba indang osang tejangja ka angazükba sülen Jammu and Kashmir Police, Army aser Central Reserve Police Force (CRPF) lonejemer Hombarnü anepdang Pulwama kübok Nehama yimtsüng meketbangba sülen khatap tenzüka liasü. Source kati ashiba agi, sepaitemi khasetba telungpur ana ya Riyaz Ahmad Dar aser Rayees Ahmad ta jangjaogo. Dar, shiba Kakapora yimtsüng nungi lir, pa küm ti tejakdang iba telok nung aden. Pa ya iba tesem nung telungpurtem rongnung tejentiba liasü.

Police sources-i ashiba agi, Dar ya police records nung category 'A' militant ka ama züngoksema liasü aser taoba mapanga pa aiben sepaitem nungi jenboa aruogo. Ahmad ya-a police records nung category 'A' militant ka ama züngoksema liasü. Hombarnü sepaitemi telungpurtem jenoka alitsü atema temulung melemi bilemba ki ka meketbangba sülen telungpurtem yagi jena aotsü atema sepaitem dak injang khaloktsü aser iba sülen sepaitemia meyiper item telungpurtem dak injang khalokja liasü. Sepaitem team yagi iba ki amakba mapang prangbong tesashi amshia liasü. Bomb aser injang khaloktsüba sülen iba kidang mi adok koba kidanger ki nunga jangruloka liasü. Ki merketetba mapang police temi telungpur tasü mang ana nguteta liasü.

AAP lenir Sisodia-i bail atema mepeshiba SC-i magizük



New Delhi, Aami/June (Agencies): Delhi liquor policy ken o nung CBI aser ED nati tashishiba benoker aliba dak sendakba nung AAP lenir Manish Sisodia-i bail atema mepeshiba Supreme Court-i Mongolbarnü magizük. Ajsüaaka SC-i ashiba agi, ken o dak sendakba nung Enforcement Directorate (ED) aser Central Bureau of Investigation (CBI) nati parnok indang prosecution complaint aser charge sheet benokba sülen Sisodia-i bail atema temepeshiba agütsütetsü, ta shiogo. Prosecution complaint ya ED indang charge sheet ka den kasa lir. Justices Aravind Kumar aser Sandeep Mehta nati kümetetba vacation bench kati, ED aser CBI tenüng nung nokdakba Solicitor General Tushar Mehta-i, central probe agency temi July 3 nü tashi nungbo prosecution complaint aser charge sheet tatembangbuba benoktsü ta ashiba mangaoka yuogo. Sisodia tenüng nung nokdaksang senior advocate Abhishek Singhvi, shibai

Sisodia atema bail meshija liasü pai, yimden yimsüsür ya ita 15 shi tepuokdak yua lir ajisüaaka ken o dak sendakba nung trial tang tashi metenzüki lir, ta ashi. Paisa, trial ya tangsa tangbo metenzüktsü, kechiyong ken o bushisüngdang tang tashi südar, ta ashi. Delhi High Court-i May 21 Sisodia-i bail atema mepeshiba magizükba sülen Aam Aadmi Party (AAP) lenir yagi SC nung ken o benoka liasü. Taoba Delhi deputy chief minister atema tetsükdaksü adoka high court-i pai bail atema mepeshiba magizük aser ashiba agi, ken o ya tashi mashiyimi amshiba aser nüburtemi pa dak tamang kateta aliba anema inyaksangshi ka lir. April 30 nü high court indang trial anema Sisodia-i ken o benoka liasü. Sisodia ya liquor policy ken o dak sendakba nung pai shilem agiba dak ajemdaker CBI-i 2023 küm February 26 nü pua liasü. Iba sülen ED-i senotsü ochi meshi-i amshiba ken o nung aija pa March 9, 2023 nü apu. Pai Delhi cabinet mapa 2023 küm February 28 toktsü.



TIR YIMYIM YIMOBILEM (EDITORIAL)

DIMAPUR RASEMNÜ, JUNE (AAMI) 05, 2024

Takok dang tuluba

Nagaland nung taküm 2024 küm Lok sabha election nung MLA tejang kata maliba Congress te1lok tenüng nung toktepsang Wabong Süpongmeren Jamir adokba yabo takok danga tuluba aser taoba ta züngshitsüsa tesüngmangtsü takok ka lir. Atangji, ibaibo nisung kisüngi inyakba masü Tsüngremer mapa ta angateter. Aji oda, tang Nagaland nung yimsü tesüdak MLA 60 prongla külen aser MLA kata maliba Congress telok külen ta asayatsübaji nisung tsütsü nungibo tanur o tain na asayar amato liasü. Ibayongji, mezüngbo Congress telok tenüng nung Lok sabha election nung toktepner malitsü amai nisungtemibo bilem. Ajisüaka, Congress asoshi Nagaland nung Subongmerenji mapang shitak ka nung nisung shitak ka shimtetba candidate liasü. Atangji, Nagaland nung Lok sabha nung amentsü atema tatar ka dang yoker, anungji tanga state tulutem den apitepdangbo Nagaland nung tatar ka yokbaji kecha balaka tongtibangsa mezüngshitsüa akok. Ajisüaka, tatar ka yokyonga mesüra 80 yokyonga nübertem olajibo kasa dang, anungji Nagaland nung nübertemi tatar ka shimtetbaji Nagaland nung alirtemi angatetba aser aginüba osang ka center dangi yoker asütsü. Aji oda, tang Lok sabha election nung polling station aika nung polling agent-a meyutetba Congress telok nem Nagaland nung alirtemi vote aika agi akoktsüsa takok tulu agütsübaji, ashiko, Congress ajungba agi mesüra Congress aginüba agi masütsüa akok saka center nung BJP teloki tamangba yimsü nung onsara kongshiba agi balaka Nagaland nung alirtemi mepelaba sayuba mapa ka asütsü. Atangji, jungjunga bilemdangdi süra tang Lok sabha election nung ya Nagaland nung BJP telok nungibo shinga metoktep saka Independent candidate ka den Congress aser NDPP candidate na liasü. Ajisüaka, NDPP telokji BJP telok den külemi aoba telok aser oagi Lok sabha nungbo BJP teloki yimsü asüba sülen tashi angaa anidaksüba telok asünungji, Nagaland nung Khristan-tem asoshibo NDPP telok nung election-i aibaji BJP telok nung aiba den kasa liasü. Aji oda, tang Lok sabha election nung NDPP telok nung aisang Dr.Chumben Murry-i tamakok angubaji pa tamakok masü saka NDPP aser BJP na tamakok lir. Aji oda, Congress telok nung Subongmeren Jamiri anguba takokjia pa anguba takok masü mesüra Congress telok tenüng nung anguba takoka masü saka Nagaland nung Khristan-tem takok asütsü. Kasaji, tang Nagaland nung Lok sabha nung takok anguba ya Aor takok masü aser tamakok angubajia Lotha nung tamakok masü saka ibaibo Naga nungertemi BJP telok dang India lima akümertemi lateta yutsüba temzüng akümtsübu linük nung kin tulu tila ta kecha mali aser Hindu, Muslim aser Khristan ta kecha mali saka linük nung tetsübu tarendak melii pei pei Tsüngrem dang külemtettsüsa tesünep tensa mapang ka alitsüla ta metetdaksüba mapa ka asütsü. Nisunger yimya nung pei indang tamajung jembibabo manganer asünungji, Naga nung BJP nung adenertemibo BJP teloki Hindu yimsü aser sobaliba dak alaka tanga tamangba yimsü aser sobalibatam samatsütsü meranger ta jembiba o tem ya manganütsüa akok, ajisüaka oagi Delhi nung BJP nung tongti lenirtem dang asüngdang nungbo parnokibo hau asütsü, kechiyong Naga Khristan-temi Nagaland Khrista Asoshi ta jembiba ama Bharat, aji India, ya Hindu nung asoshi ta parnokia bilema inyaker. Iba jagi BJP ajangzüker saka küm ter yimsü serbo küm terkabuba nungibo anakshi tenzüker. Atangji, Congress telok nung lenirtema Hindu yimsü nung akangasünga amangertem, saka tepilaji parnokibo tanga tamangba yimsüa akhümtsübur aser menokdang. Iba tangatetba nung Naga nungertemi parnoki shimtetba MLA 60 prongla nem teshisadangtsü lesson tuluka agütsüogo. Atangji, tang Nagaland nung Congress teloki anguba takok yabo sen agi aliba aser yimten tashi agi inyakba takok masü, saka akhi election nung akokba takoktem dang nungia kanga agia tuluba tangatetba agi akokba takok ka asütsü. Iba takok yabo Tsüngrem nem agütsütsüla aser kasa tangatetba nung Naga nungertemi taruba election-tem nunga shilem agitsüsa renema atatsüla.

OLEMSABANG

Tanela dang masü ali shia renemshidi

~ S. T. Yapang Lkr, Kohima.

(Yashi adok nungi...)

8. PMMVY- Social Welfare Department nungi itasen machir kibong nungi mezünglenbo mezüng asoba tanur nem sen 5,000 agütsü, saka aikadi tanabuba tasembuba tashia agizüka agiogo, ibai yimdak mesüra jila nung Anganwadi worker-temi pei yimdak/kiyong nung tanur mashisa aliba tetsütem tenüng züluka iba teyari ya agidaktsütsüla, ajiasaka aikati züzüa yutsüba ajurua aruogo. Tanüasünga mezüng asor nem 5,000 agütsüba dang masü tanur tanabuba asobaji tetsür chanu sora ajia ano sen 5000 agütsür.
9. Old Age pension (IGNOP), sensaker tantsür tambur mangudang kibong junga alir shirnok adianu teyariteper ali, item pur tama raktepa agimar.
10. Scholarship; takok tajung angur asoshi tim, saka general pur asoshi Scholarship kodang arudir Naga nung tamanger tebutem ajak ama aluyimer aser tetsütem ajak kimoker akümer.
11. PMUY- Iba scheme ajanga sensaker kibongtem nem pei anasatiba Gas Agency nungi Gas connection angadi agütsür, iba shiti nungsa tanga agency nung gas magizüki alirtem aser nominee inoksang jia kecha nungia gas agizüka malitsüla ta shia lir, saka asen Naga nung itasen achiri agizükba dang masü, tanga Gas Agency nungi gas agizüka alirtem aikadi agizüka lir.

Tekalen shia aliba scheme-tem yabo ruling opposition ta mali sensaker aser temsüa alir ajak angutsüba mapatem lir. Asen lima itasen machir sensaker aikati ibai memetet, saka itasen achirtembo aikadi agizüka lir, anungji parnok anemaji nisung kati keno benok nung sorkar mapaji toktsütsü asü pei agia aliba sen/teyariji tetemlok keter meyipa agütsüjar ka shimtsüsa akümtsü akok. Yamala scheme zünger mezüngma lir, item teyari tim masü nung agirtem ya ajak ama arogo pur aser arogo nung tongti shilem agirtem. Asenok dang sannüker mesüra sayutsüngir aikadi ibai mesayutsü, kechiyong parnok aikati iba indang ya jangja memetet.

Tia maka item ajak ya sensakertem asoshi aruba sürnung sensaker aika züluoka mali, osang kaketter nunga mezünglen adokogo, ajisüaka sensakertemi osang azüngyonga itemji merepranger, aser parnok tanurtemi tsürabur sensakba indang bilema mali, social media ajak sünga prokshio, ajisüaka sensaker timbai iba mapang tajungji malangzük, kodang nisung tali kümer shibang idangji ang sensakertemi tenüng zülüoktsü bilem, saka takar ajak ama züluok nungji nisung tali joko meinoktettsüsa akümba scheme aika lir, sensaker chirnurtemji anogo munga opung mesükshia mungdar, ajisüaka pa/lai tsüraburji sensaker ta bilema mali nungji tsürabur temsüa aliba scheme nungji inoktsütsü mebilemer. Ano külen tsüraburtemi lesson dang meranga azüngtsü sayu nungji lanur aikadi kidang metsü mersü kong nungi bener arua soruchioka chiyonger taküm nung mangashidang aser memetet, oda sensaker chir ang nisung maküm aser leni mao. Anogo munga opung amshia kazüdar, mapa tilaka shiloka yutsü nung mazüng kisüng, yamaji tesasatsüka sensaker kibong aika ano iba putu nungbo sensak tia nungi mepilatetsüsa lir, saksaker sensakba akümtsü, takartem takaba akümtsü. Tekalen zülutsüa aliba onüktem ya azüngtsüa süngla sensaker chirnurtem asoshi mapang mali, kanga meima bilemetsür.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung tamanger ka tepsetba sülen alima nung lenirtem dang mera agitsü ajungshir

Islamabad, Aami/June 04 (Agencies): Tamangba yimsü mezüngmeshi ta tai tonglokja züka merenshir anogo ter lir tamanger ka asüba sülen Pakistan nung arogo lenir kati alima nung lenirtem dang mera agitsü ajungshir.

Arishi küm 70 shi tain Nazir Gill Masih yagi Islam yimsü mezüngmeshi ta tai tonglokja May 25 nü Mujahid Colony, Sargodha nung nisung telok kati züka merenshi.

Masih dak tai tongloktsüba nung temulunglemtsü maka aser Pakistan nung tamangba yimsü tsütsü nütsüing tajembapur tem anema tim masüba nung linük indang blasphemy laws amshir, ta Aid to the Church in Need (ACN) ajanga ashi.

Tamangba yimsü mezüngmeshi ta tiazü nung tai tongloktsüba merenshitsu atema ozüing meyangly tashi Pakistan nung Khristanpur aser danga kin tilatem kodanga kumzüka malitsü, ta Catholic bishop kati ACN dang ashi.

Khristanpur aika azüngtsü aser zülutsü memetet, anungji parnoki asaa tamangba yimsü mezüngmeshi masütsü, ta Catholic Bishops' Conference of Pakistan tir Bishop Samson Shukardin-i ashi.

Tiazü nung tai tongloktsüba aser nisung telok adenshia timtem ajurur, parnok kinunger aser kidangertem

amokmerenba, aoksatsüba aser timtem balala agütsüba anentsü atema ketdangsur temi mera agitsüla, ta pai ashi.

"Tamangba yimsü mezüngmeshi ta tiazü nung tai tongloktsüba nisungtem tepuokdak ayutsü densema merenshitsu atema ozüing yanglutsü kanga tongtipang lir," ta pai ashi.

Pakistan nung Islam tamangba yimsü mezüngmeshi atema temerenshi ya takum tepiyong tepuokdak ayutsü mesüra tasüba temerenshi agütsütsü lir, saka iba ozüing ya meshidaki amshir ta Khristanpur aser danga human rights groups temi ashir.

Tamangba yimsü mezüngmeshi atema tasüba temerenshi ya court temi magütsü arur, saka ken o jembishiba nung küm aika agir, aser iba mapang tai tonglokja alirtem tepuokdak ayur. Tepuokdak nungi chiokera züka merenshitsu mesüra tepsettsü jenjang nung alir.

Taoba küm Punjab kübok Jaranwala district nung Khristanpur-i tamangba yimsü mezüngmeshi ta tai tonglokja azüdokshiba ketdangsur temeremerenshiba mechi iba ozüing ya tai maket kin tilatem anema hadir ka ama amshitsu temulung uludaktsür, ta Bishop Shukardin-i ashi.

"Kin tilatem, talisa

Khristanpur kumzüka ayutsü asoshi sorkari süoki ia ozüing meyangly tashi mashi lenmang nung blasphemy ozüing amshiba tali tamajungba akumtsü," ta pai ashi.

"Pakistan anema inyaktsü onoki masüngdang. Saka onok takum aser kinungertem takum kumzüka ayutsü asüngdang."

Pakistan nung Khristanpur aser danga kin tilatem reshikangshiba anentsü asoshi bendangeri tashi amshitsu dang lir, ta pai ashi.

Masih asüba atema kanga jashir, ta CLASS-UK indang director Nasir Saeed-i ashi. CLAAS-UK ya Pakistan nung Khristanpur-i tamangba yimsü mezüngmeshi ta tiazü nung tai tongloktsüba anema legal tsütsü angati teyari agütsür.

"Iba tazü mapa ya ajanga asen linük nung blasphemy laws mashi lenmang nung amshiba ajanga timtem ajuruba sayur aser Pakistan indang blasphemy laws tekereba nung yanglushitsu ashir," ta pai ashi.

"Tarutsü nung iba ama lendong mataloktsü atema Pakistan sorkari tekeraba nung mera tajung agitsüla," ta Saeed-i ashi.

"Nazir Masih asüba lendong ya kodanga mataloktsüla ka liasü. Pa asüba amajok mekumdaaktsütsü atema linük balala teyari nung Pakistan sorkari mera agitsüla," ta paisa ashi.

ANOGO ABEN TSÜNGREM DEN

Chuba putirtem

Nenok teshimetetba kin, chuba putir telok, temeshi kin, aser Tsüngrem pei agitsü purtem nenok lir. 1 Peter 2:9

Na Khristan ka, süra na Tsüngremi shimtetba putir ka lir. Chuba putir ka ama na maneni chuba dangi aotsü lemang lapokja lir. Ne taküm nung nungdak adokra, na atema tetsüngdai air putir ka bushitsu menüngdak. Na chuba putir.

Aji oda süaka putira, pa mapa lir. Putir inyakyim kübok putir kati putir mapa inyaktsüla. Laishiba nung putir kati kija inyakyim amshitsu shia mali, pa balaka tenzüka mapa mali. Putirtem külemi mapa inyaker (Lev. 9:1). Lairen masüba kija mapaji Tsüngrem putir kübok pai bilemba mapa nungi pilatsü akok.

Nübur matsüngdang putirji Tsüngrem melen noktakba lir, saka pai ano Tsüngrem dangi nübur tebilemba abener. Na meketa kar Tsüngrem dang mepishitsu putir sarasadem nungdaka lir asü? Karbo ne taküm nung Tsüngrem angu nung dang Tsüngrem metetta arutsüba alitsü akok. Khristaji shidakba taküm lir ta pa nübur taküm agi sayuba alimai nungdaker. Tsüngremi ajaba dang nungi asen mapa temaba südaktsübaji lendong lir. Asenok mezüngbuba putir asütsü aja, aser tanabuba mapa ka nung sotdaktsü aja. Kodang asenoki ibai meinyaklir asen meketa alir ajaki asenok ajanga Tsüngrem dangi aotsü songtemtsü. Tsüngremi secular mapa kati ajatsü akok, saka iba dang nungi talisa na Pa putir ka asütsü shimtet.

Chhattisgarh nung tamanger ka tepsetba sülen kinungtsü jena ao

New Delhi, Aami/June 04 (Agencies): India nung Chhattisgarh state kübok Khristan ka tamangba yimsü mechi tepsetba sülen pa kinungtsü ya ita ka tetsübo nung lir jena ao.

"Parnok kü kinungbo tepset kü tenük agi nguogo. Nia merenshi saka ni jena otet. Kü kinungbo tepseter temi ni bushia tepsettsü tsübor," ta Jime Kawasi-i ashi. Kawasi kinungbo arishi küm 22 tain Kosa Kawasi ya Bastar District nung May 4 nü tepset.

Darbha block kübok Kapanar yimtsüing nung la kinungbo tepsetba tesem nungi talangka pilar ki ka nung la jenok. Kasa yimtsüing nungi ano tantsür-tambor aser tila tanurtem densema Khristan kibong pongui la bushir mangu kasa anogo jena ao.

Yimdaklir temi tsüngrem külemba benjong nung Khristanpur den sendaktepa aliba kinungertem shilem magidaktsütsü tenokdangba agütsüba tejashi nung kinunger temi Kosa Kawasi ya tepset.

Kosa Kawasi tebutanubo Dasru Kawasi aser par kinunger Madiya Kawasi nung densema yimdaklir nisung 20 shi anepdang 10:00 ako meta par kidangi oa pa den

rarapangsen tenzüka aser Khristan yimsü yutsütsü ashi, ta iba tesem nung aliba Khristanpur rongnung lenir Santosh Mandavi-i ashi. Kosa Kawasi-i tamangba yimsü yutsütsü memulung nung parnoki pa aser pa kinungtsü dak züka merenshitsu tenzüka, ta pai ashi.

"Parnoki apuani dak süng agi azük, tetsüing agi metsü aser teka agi atsüing," ta Mandavi-i ashi.

Kawasi-i tamangba yimsü yutsütsü memulung, anungji pa tebutanubo aser kinungeri Kosa dak kotari agi tepok nung asemben atsüing.

Kosa Kawasi kinungtsü aser tenu tanubosang nungeri pa kumzüka lenmang leni ao aser ambulance aja, saka parnok ambulance ata alidang iba telok nungi nisung kar arua pa tekong rangdangtsütsü merang, ta Mandavi-i ashi.

Kosa tenu aser pa kinungtsü ano pa kumzüka tanemi nisung telok nungi anizüker ao. Ajisiüka Dasru Kawasi aser Madiya Kawasi nati pu bener arua Kosa tekolak nung akoa pa yangji asü, ta Mandavi-i ashi. Iba lendong ataloker ghonda ka shi lir police tem arua pa indang tasüming ya bener ao.

Kosa Kawasi tenu Hidma

Kawasi ya Khristan ka lir aser iba lendong matalokdang Dasru Kawasi aser Madiya Kawasi nungeri anir nisung telok ya par kidangi arudang pa jena ao.

Hidma jena ao aser takum lir, saka nisung telok ka yagi par ki raksatsü, ta osang ajanga ashi.

Iba lendong ya matalokdang kinunger aser yimdaklir temi Kosa Kawasi dang Khristan yimsü yutsü Hindu yimsü dangi marura tepsettsü ta amokmerena liasü, ta pastor Mandavi-i ashi.

Kosa Kawasi-i Darbha Police Station nung pa aser tamangertem amokmerenba indang shijen shiaka ketdangsur temi mera kecha magi aser First Information Report benoktsüa memulung ta osang ajanga ashir.

Mandavi-i ashiba agi, May 6 nü pa Kapanar-i ao aser police tem yimtsüing nung tesem balala nung prokshia aliba angu. Police station tekolakbai pa dang Jime Kawasi ya mile 28 orr Dantewada government hospital nung yirur munga lir ta ashi.

"Ni la ajurudang la kanga tetsübo nung liasü. Lai iba tatalokba indang otsü kü dang ashi," ta Mandavi-i ashi.

Iba lendong ataloker anogo

ka lir police temi nisung tepsetba ken o nung Dasru Kawasi aser Madiya Kawasi apu saka tena dak alaka dangar shinga mapu, ta Mandavi-i ashi.

Kosa Kawasi metepsetdang yimtsüing nung lenirtemi kibong nung Khristan ka dang lira kinunger shinga Kapanar yimtsüing indang Ammajugani benjong nung metekdaktsütsü ta telemtetba agia liasü. Iba benjong nung teti (mango) mezüing ongzükba ya parnok tsüngrem nem agütsür, ta Mandavi-i ashi.

"Iba yongji Kawasi'er kinungertem mepelai akum aser tejashi nung Kawasi aser pa kinungtsü dak züka merenshi aser Kawasi ya tepset," ta pai ashi.

Danga Khristan kibongtema kinunger temi züka merenshitsu tetsübo nung liasü aser Kawasi tepsetba ajanga kinungertem temulung ulidaktsü aser iba yongji parnok ajak pei takum kumzüksü mechi jena ao.

Iba benjong mapang yimtsüing nung alir ajak ken tena tsüingsanger aser parnok indang tsüngrem nem teti aser shiruru bendanga agütsür aser külemi chia-ajemer. Iba benjong nung shilem magirtem küm tepiyong teti mamshidaktsür, ta Mandavi-i ashi.

"Yimtsüing nung ketdangsur temi iba ama yimya ya mamshitsu. Parnoki ki aser nisung takum jenti raksatsür. Kosa takum samaogo, Jime ya joko tanur süaka amitsür kumogo, Dasru Kawasi aser Madiya Kawasi tepuokdak lir aser parnok kinunger temi khuret ajak abentsü," ta yangji alir kati ashi.

Jime Kawasi ya tang tashi temang nung tashi mait aser tetsübo nung lir, aser la ya mile aika pilar danga Khristan kibong pongu den külemi alir, aser la kidangi meyipa aotsü maotsü mejangja.

"Ni maneni Yisu sülen anidakner aser tenzüknier. Iba Yisu asoshi kü kinungboi takum bendanga agütsütsü mulunga liasü, anungji nia pa tsüingsü nung jajatsü. Imlibilema ni atema sarasademjang, ni nenok sarasadem nungdaker," ta lai ashi.

Khristanpur yariba Open Doors ajanga alima nung Khristanpur alitsü asoshi linük tamajungtiba 50 asadangba 2024 World Watch List nung India ya jenjang 11 buba nung lir. 2013 küm India ya jenjang 31 buba nung liasü, saka Ato Kilonser Narendra Modi-i aniba sorkar aruba sülen jenjang tamajungba akum.

**AO OSHI ANGAZÜKDAK:
TANÜ ANGAZÜKTSÜBA OJANG**



Sürranü

(n) sürradong aika aliba tesem (palm grove)

* Sürranü nung tanga süngdong memeyir.

Sürrashi

(n) sürra tu agi yangluba anüshi (umbrella made of palm leaves)

* Tsüraburtembo tzünglu arudang sürrashi dang aponger jaja.

OLONG PAITEP # 6809

1					2				3
							4		
5		6			7				
8									9
							10		
				11	12				
		13							
14					15				
				16					

TIPIEN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüik asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6808 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kioktsü, 17. Itsük,
- 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüksü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

NAI-A YA METETTER MA



Andhra Pradesh kübok Vijaywada nung Hallel Music School-i Ingenious Charm World Records den yaritepa otsü tasen ka yanglutetogo. May 30, 2024 nü Hallel Music School-i nisung 396 longjemer Largest Electronic Keyboard Ensemble (online and offline) sentong ka agia liasü.

Hallel Music School Founder & President Pastor Venu Gopal Dand ingi lenisüba kübok Chief Adjudicator Anand Rajendran aser Chief Co-Ordinator Bindu Priyanka nungeri iba sentong takok ngua agia otsü tasen yangluogo.

Iba sentong nung shilem agir ajak nem certificates, medals aser badges agütsüogo aser Ingenious Charm World Records o International Achievers Book of Records ajanga kuli agütsüogo.

Arunachal Assembly elections nung tetsür 4-i takok angu



Tsering Lhamu



Nyabi Jini Dirchi



Dasanglu Pul



Chakat Aboh

Guwahati, June 4, 2024 (Agencies): Taküm Arunachal Pradesh assembly elections nung tetsür 7 toktepa nungi pezüi takok nguogo aser iba ajanga züngsem 60 agi akümba assembly nung tetsür shilem tuluba kümogo.

2019 küm tetsür 3-i takok ngua liasü aser taküm parnok pezü kümogo aser ibaji assembly menden ajak nungi 6.6% lir. Takok anguba tetsür candidate ajak ya BJP nungi lir. 1978 küm Arunachal Pradesh nung mezüng assembly

elections agiba sülen tang tashi nung tetsür MLA 17 shimogo aser iba mapang tsüingda tetsür 59-i toktepa liasü.

Taoba MLA Jambey Tashi kinungtsü Tsering Lhamu-i votes 1,531 agi Lumla nungi takok angu. November 2, 2022 nü la kinungbo asü aser iba sülen taküm February ita by-election agidang lai takok ngua liasü.

Külen, Anjaw district kübok Hayuliang assembly menden nungi Dasanglu Pul den tetokteper shinga melii takok ngua liasü.

BJP candidate Chakat Abohia Khonsa West menden nungi votes 804 agi takok angu. Chakat kinungbo ya taoba NPP MLA asür Tirong Aboh liasü aser May 21, 2019 nü NSCN telungpurtemi pa khaset.

Ano, tang mezüng atema tokteper Nyabi Jini Dirchi-i Basar constituency nungi MLA teinyakdak Gokar Basar madak votes 1,791 agi takok angu.

2019 küm tetsür asem-Dasanglu Pul, Gum Tayeng aser Jummum Ete Deori nungeri takok ngua liasü.

Citizen Action Party president Bharat Basnet-i mapa nungi anener

Gangtok, June 4, 2024 (Agencies): Sikkim nung Citizen Action Party (CAP) president Bharat Basnet-i menden nungi anenogo. Pa ya MP candidate liasü aser pai tamakok anguba atema tenüing agia sodi agi.

Citizen Action Party (CAP) nung Basnet ya tongtipang lennir ka lir aser pai president menden nungi anenba ajanga lenisüba nung temelenshi alitsü.

Külen, Sikkim Krantikari Morcha (SKM)-i Sikkim nung

jenjang tajung aliba sayua Lok Sabha menden ka nung takok nguogo.

SKM Member of Parliament (MP) Indra Hang Subba-i CAP candidate Bharat Basnet madak votes 78,766 agi takok angu.

"Tan election nung nübertemi sorkar pusema vote enoktsüogo. Assembly nung aser parliamentary menden nung onok nübo teimba kümogo. Sikkim nungeri maneni ozü party, ozü lenisüba, Prem Singh Tamang aser tanga MLA tem

asir lennirtem dak tamang akaba sayuogo" ta Indra Hang Subba-i ashi.

"SKM-i Sikkim renloksü atema mapa inyaktsü" ta paisa ashi.

SKM-i National Democratic Alliance (NDA) den tesentaktep ayutsü asü masü ta osangbeneri asüingdangdang "Onoki tang ang takok angu. Party-i iba atema lemtet agitsü aser kobi melii yimjak nung metetdaksütsü" ta Subba-i langzü.

Manipur Chief Engineer'er ki grenades amshia amak

Imphal, June 4, 2024 (Agencies): Hombar aonung Manipur nung Department of Education (Engineering Cell) Chief Engineer'er ki bomb amshia amak.

Yasüng 11:50 ako meta Imphal West district kübok Sagolband Nepram Menjor

Mamang Leikai nung grenade ana pokdaksü.

Mejangjaba nisung kari Chief Engineer Laishram Sarat Singh (58) kidang grenade ana mereplokja pokdaksü. Iba mapang Eco van gari ka kima nung anena aliba raksa.

Kechi atema bomb amshia amak kuli menguteter aser külen telok kechaia tenüing agia sangdongba mali.

Iba osang angashiba sülen Imphal West district police commando aser Manipur police bomb detection and disposal squad tesem tonga ao.



Assam nung tzümetsüng tensa kanga mejungi kümogo aser iba ajanga district 10 nung nisung lakh 6 tema dak kongshiogo. State sorkari tzümetsüng timtem aliba tesemtem nung relief camps 191 aser relief distribution centres 108 lapoka lir aser National Disaster Response Force (NDRF) o State Disaster Response Force (SDRF) teloktemi yaritepdar. Tang tashi nung Assam tzümetsüng lendong balala nung nisung 18 süogo, yimtsüng 577 metsüngbangba lir aser ali hectare 6,000 tema alu raksatsüogo.

Germany tzümetzung lendong nung nisung pezü asü



Berlin, Aami/June 4 (Agencies): Germany anüolentip tzümetzung agi kongshia nisung pezü tashi asüba sülen teküzmükertemi nüburtem tzi agi metsünger aliba tesemtem nungi anintsü meranga arudar. Chancellor Olaf Scholz-i, iba ya tzümpung tamajungba küma melenshia aoba temaitsü ka lir, ta ashi.

Hokolbarnü tziunglu kanga sashia arua tzümetzung adokdaksüba sülen Bavaria aser Baden-Wuerttemberg tesem nung alir meyirejang aika pei talidak ki toktsür aotsüsa aküm.

Hombar aonunga nüburtem aika anintsü atema jenzang agiogo, kechiyong tzümetzung nokdaksü atema tenokdangtsü balala toktsübatem mapa minyaki liasü.

Hombarnü tziunokdang ka pokdangba sülen Bavaria kübok Ebenhausen-Werk tesem nung alir nisung 800 shi dang pei ki toktsür aotsü

tetuyuba agüja liasü. Tzümetsung agi tamajungtiba kongshir aliba Manchig-Pichl temeket nung alirtem danga parnok ki temaba takdang nung jenoktsü tetuyuba agütsüogo.

Munich antoklen tip nung tzümetzung agi kongshir aliba Reichertshofen tesem semdangba indang jembiba mapang Scholz-i, iba amala tzümetzung ya khen atalokba ka dang masü kümogo, ta ashi.

"Iba ya langkabo tai aliba temaitsü lir. Asenoki nisungi tzümpung melenshidaksüba nokdangtsü atema jenzang agibatem sentoka metoktsütsüla," ta Scholz-i osangbenertem dang ashi.

Bavarian state premier, Markus Soeder, shibai Scholz meiner oa liasü, pai tzümpung melenshiba dak sendakba nung "full insurance" kecha mali ta ashi.

Tzümetsung ajanga timtem balala bener arutsüba achaayangtsü atema Bavaria

kija nunga nisung 20,000 shi yoker lir, ta pai ashi.

Baden-Wuerttemberg nung police-i ashiba agi, tzümetsung aruba sülen Schorndorf nung tetsür ka aser tebur ka basement nung sür lia ngutetogo.

Kasaji Schrobenhausen, Bavaria nunga arishi küm 43 tain tetsür ka basement nung sür aliba teküzmükertemi Hombarnü ngutetogo.

Volunteer firefighter ka tasü mang Deobarnü ngutetba sülen iba lendong nung asür pezü jungogo.

Teküzmükba maparen balala inyakba mapang arishi küm 42 tain volunteer ka mena aliba rong meküpokba sülen pa asü. Deobar aonung iba rong meküpokba sülen ano arishi küm 22 tain volunteer ka tang tashi monguteti lir.

Iba nisungba bushiba inyakyim anenogo, kechiyong tzi kanga metsünga atuba den tzi current kanga sashira küma liasü, ta local police-i ashi.

Hamas teloki pua bener oa aliba nisung 4 asüba jangjaogo

Jerusalem, Aami/June 4 (Agencies): Israel military-i ashiba agi, Hamas puri October 7 nü pur or aliba nisung pezü asüba osang parnoki jangjaogo.

Military-i, southern Gaza nung Israel nung sepaitemi Khan Younis meita aoba mapang par pezü ya tepseta liasü, ta ashiba den tasü mang ya tang tashi Hamas puri yua lir, ta shisem.

Nisung pezü ya British-Israeli Nadav Popplewell, 51, Chaim Peri, 79, Yoram Metzger, 80, aser Amiram Cooper, 85 ta jangjaogo.

IDF otongdar Rear Adm Daniel Hagari-i ashiba agi, hopta tsüngda itangiter osang bendenba sülen parnoki iba ya asateta liasü.

"Khan Younis nung onoki Hamas pur anema meita aoba sentong ka ayongzuka agiba mapang par pezü ya tepset ta asatetogo," ta pai ashi, saka

osang tejanga magütsü. Taoba ita Hamas puri Nadav Popplewell ya Israel-i April ita amakba mapang asü ta ashi. UK Foreign Office-ia iba ken o asadangdar, saka pa asüba osang tang tashi mejangja ta shir liasü.

Parnok pezü prongla ya October 7 nü Gaza Strip anasa kibbutzes tesem nungi pur oa liasü.

Hostages and Missing Families Forum ajanga kinungertemi ashiba agi, item nisungtem asüba osang angashia lenirtem ajak pei tanüla kanga junga bushitsüla.

Kasa sangdong ajangsa, "Chaim, Yoram, Amiram, aser Nadav nung taküm lia pur ao aser parnok rongnung karbo taoba mapang tenangzüktepba yanglua chiokertem den külemi liasü ,aser parnoka par linük aser kinungertem dangi meyipa arur alitsü asü," ta ashi. UK Foreign Secretary

David Cameron-i X nung post ka ajanga ashiba agi, Nadav Popplewell asüba osang angashia pa kanga temulung koremer. "Mangyim jashi mapang kü tebilemba par kinungertem den lir," ta pai shisem.

Nadav Popplewell ya pa tetsü den külemi par kidang nungi pur ao, ajisüaka pa tetsübo chiokogo. Pa adianu Roy bo Hamas puri amakba mapang tepset.

October 7 nü Israel amakba mapang Hamas puri nisung 1,200 shi tepset aser nisung 251 pur oa liasü.

November ita hopta ka tepeyong sensaksemba sülen Hamas puri nisung 105 chioka liasü.

Iba sülen Israel-i Hamas telok samatsütsü asoshi Gaza amak tenzük aser ita ti tsüngda tang tashi nung nisung 36,470 tepsetogo, ta Hamas indang health ministry-i ashi.

Molungnen O



Asür Mrs. Temjenkokla (Chuchuyimlang) ajungbena alima nungi piladang lokti aser kija kibong shirnokisa rongsen, sarasadem aser shisatsü agi yaritepogo nenok ajak dang kangasa pelar.
Tsüngremi nenok ajak moajangma.

~ Temeim Kinungertem.

OFFICE OF THE
CHANGTONGYA SENSO TELONGJEM DIMAPUR
DIMAPUR: NAGALAND
Motto: *Telongjem Aser Teyaritep*

KONANG TETUSHI AGÜTSÜR



Tawa sangdongba NPSC-CESE 2023 nung Takuyanger Jamir aser Temsujungla na jala Dr Temjennaro Jamir-i Higher Education kübok Assistant Professor in Mathematics jenzang ngutetba atema Changtongya Senso Telongjem Dimapur (CSTD), Dimapur Changtongya Tsur Telongjem (DCTT) aser Changtongya Kaketshir Telongjem Dimapur (CKTD) ajanga tejak tenteta aser tepela nung konang tetushi agütsür. "Lai takok anguba pela agizüker aser tarutsü anogotem nunga takok lidakjang ta onoki sarasademtsür.

Sd/- President CSTD	Sd/- President DCTT	Sd/- President CKTD
------------------------------------	------------------------------------	------------------------------------

OFFICE OF THE
AO SENDEN
"Xübur Asashi" (For the People)

Dt : 04-06-2024

SANGDONGER

Aruya aliba Mokochung District kübok Municipal aser Town Council election dak sentakba nung nübur asoshi temetetsü aser tekümdangtsü yamai sangdonger.

- Municipal Act, 2023, nung shia aliba ama candidate ka ji Indigenous Inhabitant of Nagaland asütsüla.
- Polling day nung Ward ka nungi kati oa mesüra yimtsüngtem nungi arua election Model Code of Conduct-i memelaba tashiyim aser ambangyim mapa meinyaktsü.
- Taoba Municipal Act 2001 nung asen sobaliba dak mapetba Arla kar enoksemba ajanga asen Ao kin samanir sür Naga nungertem Govt. den raraa azü dena tenlaa aruogo. Anungji Municipal aser Town Council kümteter aodang asen Aor/Naga nung sobaliba, yimden yimliren aser yimsüyimpong den mapetba sarasaji aser inyakyim kecha meyanglutsü jelia tekümdangtsü Ao Sendeni sangdonger.

Sd/- (Marsanen Imsong) President	Sd/- (Imtipokyim) Gen. Secretary
---	---

Pakistan PM Shehbaz-i China semdang tenzüker Islamabad, Aami/June 04 ama Sharif ya China nung June 4 nungi 8 tashi alitsü.

(Agencies): Sen dollar billion 4 nungi 8 tashi alitsü. March ita Pakistan Muslim Economic Corridor (CPEC) League-Nawaz (PML-N) party-i kübok tesendaktep tali tashi aniba coalition ajanga sorkar itshitsü nükjidong nung Pakistan kumtetba sülen arishi küm 72 tain Ato Kilonser Shehbaz Sharif Shehbaz ya kümsük tanabuba anogo pongu atema atema ato kilonser akum aser China Mongulbarnü China-i ogo. tang mezüngbuba semdangert alitsü.

China Tir Xi Jinping-i jaokba **(Maneni tapak 8 nung...)**

NECDC-i ayonga 3buba NECDC Achiever's Nite sentong agiogo



Dimapur, Aami/June 4 (TYO): North East Cricket Development Committee (NECDC)-i ayongzuka June 1 aonung 3buba NECDC Achiever's Nite sentong agiogo, koba Meghalaya Cricket Association-i achayanga liasü. Iba sentong ya Nagaland aser North East state balala nungi cricket asayatem tushitsü atema ayongzuka amunger, aser iba ajanga asayaba balala aser talisa cricket asaya nung Nagaland tejakdangi aoba jangjatsüogo.

Nagaland nungi narokim agizükertem:

U-16 Boys Best Batter: Aloto Sumi
U-16 Boys Best Wicketkeeper: Shyerinlo Thong
U-19 Men Best Batter: Yugandhar Singh
U-19 Men Best Bowler: Anil Gupta

U-23 Men Best Batter: Hem Bahadur Chetri
U-23 Men Best Wicketkeeper: Afzal Hussain Choudhary
3buba NECDC Achiever's Nite nung Aloto Sumi nem North East Zone Emerging Player Award (Male) agütsüogo, aser iba ajanga pai cricket asaya ajungkettsü atema shilem tajung agiba aser iba asaya nung renlokyonga aotsü asoshi pa dak sempet aliba sayur.

Kasa mapang nung Senior Women's Inter-Zonal One Day Trophy nung NE Zone nungi mezüngbuba half-century yangluba atema Sentilemla Imsong nem tetushi agütsü.

U-23 Men's Col CK Nayudu Trophy nung wicket timtiba agiba atema Neizekho Rupreo nema tetushi agütsüogo. Maneni Nagaland team-i U-

23 Men's Col CK Nayudu Trophy (plate group) aser U-19 Men's Cooch Behar Trophy (plate group) naprongla kokogo aser iba ajanga state nung cricket asaya kanga renlokyonga aoba jangjashitsür.

Iba sentong nung Nagaland Cricket Association tenüng nungi Kechangulie Rio, President; Hyunilo Anilo Khing, Secretary; aser Watinuksung Jamir, Joint Secretary nungeri shilem agia liasü.

NECDC Achiever's Nite 2024 ajanga Nagaland ya shilem agiba state ka dang masü saka Northeast nung tejakdang ser cricket asaya ajungketba state ka ta jangjaogo. Iba sentong ajanga Nagaland nungi sempet aketba asayar tajungtem adokba sayuogo aser iba ajanga NE nung cricket asaya tarutsü jenang kanga junga akümba sayur.

Bajrang nem tenokdangba agütsür aliba aginogo

Aami/June 4, 2024 (Agencies): Anti Doping Disciplinary Panel (ADDP)-i ita ana tejakdang wrestler Bajrang Punia nem tenokdangba agütsür aliba agintsüogo.

March 10 nü Sonapat nung Olympics qualifier atema selection trail agiba mapang sample agütsütsü memulungba atema National Anti Doping Agency (NADA)-i April 23 nü Punia nem tenokdangba agütsü.

Iba dak sendakba nung telangzüba agütsütsü atema Punia nem May 7 nü tashi mapang agütsü. May 13 nü ADDP matsüngdang online ajanga ken o angadangba mapang Punia tenüng nung okatsür Vidushpat Singhania-i, pai kechiba sample agütsütsü memulung iba indang kuli agüja liasü.

"Pai taoba mapang DCO-i expired kits bener sample bendentsü atema pa

sem dangba aser pa den wrestler temi kari longkak aiba ajanga parnok anema jenjang agiba dak ajemdaker dope test atema sample agütsütsü memulung, kechiyong tetendangba tai agütsütsü akok ta bilema liasü," ta panel-i ashi. Punia-i ashiba agi, pai asa sample magütsü masü saka bronze medal atema masaya tsüngda DCO/Chaperone-i pa dang sample meshia liasü.

"Pa bronze medal asaya tembangba sülenang sample meshitsü asü, saka DCO/Chaperone-i, pa asaya matai toktsür oatok," ta Singhania-i ashi.

Trials nung 65kg semi-final nung 9-1 agi Rohit makokba sülen Punia-i asayaba tesem toktsür oatok aser bronze medal playoff atema meyipa maru.

ADDP-i ashiba agi, NADA-i Punia anema Notice of Charge benoka mali asüning panel-i ken o bushisüngdang

mesütettsü, anungji Anti Doping Rules 2021 kübok Article 8 dak ajemdaker iba ya tagidak maka.

NADA-i asayar nem ya Notice of Charge agütsütsü telemtetba agira ano ken o angadangtsü. ADDP-i iba telemtetba agiba tetezü Punia international asayamung balala nung asayatsü atema kecha tenokdangba mali, ta Singhania-i ashi.

Iba obendang ya Punia-ia pelashishia agizükogo. "Dope test nungi jena aoe kü kija masü. Ni tetendangba atema kodanga memulungi maliasü, saka ni expired kits bener aruba dak sendakba nung NADA dang telangzüba meshiba tama kua ta shia aruogo, koba tang tashi mangu lir," ta pai ashi.

NADA-i iba jenjang agiba sülen United World Wrestling (UWW)-i taoba ita Punia nem tenokdangba agütsür liasü, koba yakta agintsü.

Indonesia Open: Lakshya Sen tanabuba round-i iogo

Aami/June 4, 2024 (Agencies): India nunger nungtugu asayar Lakshya Sen-i, Mongolbarnü Indonesia Open Super 1000 tournament tebur kija asaya nung Japan nunger asayar Kanta Tsuneyama straight-game nung koka tanabuba round-i iogo.

Sen-i mezüngbuba round nung minute 40 nung dang Tsuneyama 21-12 21-17 agi koka liasü.

Sen tanabuba round nung Indonesia nunger seventh seed asayar Anthony Sinisuka Ginting mesüra Japan nunger asayar Kenta Nishimoto na ka den asayatsü. French Open aser All England Championships nung atonga Sen-i semifinal tonga asayaba sülen pa Olympic

atema qualify sür lir. Ajüsüaka India nunger asayar Kiran George bo mezüngbuba round nung China nunger asayar Hong Yang Weng-i 21-11 10-21 20-22 agi tsükdaktsüogo.

Kasa asayamung nungsa India nunger tarep temeyoktep asaya B Sumeeth Reddy aser Sikki Reddy nati kanga meranga asayar 18-21 21-16 21-17 agi America nunger tarep Vinson Chiu aser Jennie Gain a kokogo.

Saka tena asoshi tanabuba round asaya melarabo masütsü kechiyong tena top seeds China nunger tarep Si Wei Zheng aser Ya Qiong Huang aser Indonesia nunger tarep Rehan Naufal Kusharjanto aser Lisa Ayu Kusumawati nunger asaya takokertem den asayatsü.

Madrid aser Mbappe na küm 5 atema tenangzüktepba yangluogo

Aami/June 4, 2024 (Agencies): Mapang talangka nungi yongya atar Kylian Mbappe den tenangzüktepba yangluba Real Madrid-i sangdong ka ajanga metetdaktüsügo.

"Real Madrid C.F. aser Kylian Mbappé na tangatettep ka dangi aruogo, aser pa taruba season pongu atema Real Madrid asayar ka kümogo," ta Real Madrid-i official sangdong ka ajanga metetdaktüsü.

Mbappe-ia, iba osang ya pa indang media account ajanga lemsatepogo. Pai iba club nung adentsü atema mapang talangka nungi jangra aliba indang lemsatep.

"Nükjidong ka atalokogo. Ni yakta nungi denüa aliba club nung adenba atema kanga pelar.

"@realmadrid. Ni tang koma pelar aji shingaiia angatettsü makok. Madridistas tem nenok ajurutsü matateter aser nenoki ni nongita yariba atema kanga pelar. ¡Hala Madrid!" ta Mbappe-i zülutsü.

Real Madrid puri Champions League final nung Borussia Dortmund goal 2-0 agi koka iba asayamung 15benbuba akokba sülen anogo ishika dang lir iba osang ya sagdongogo.

Real pur Toni Kroos, Luka Modric aser Nacho Fernandez nunger amala asayar tejentem den pilaba mapang tang Mbappe parnok rongnung densemogo.

Ajüsüaka Mbappe-i Paris Saint Germain toktsüba ya kanga jungrarabo metembang, kechiyong osang ajanga ashiba agi, tir Nasser Al-Khelaifi-i Mbappe nem pa indang tanungba itasen agütsütsü memulungi liasü.

Mbappe-i club toktsüba atema mepelai Khelaifi-i asayar nem ya pa indang itasen aser bonus euro million 80 agütsütsü memulugi liasü. PSG-isa, Kylian Mbappé nem April ita atema itasen magütsü aser osang ajanga ashiba agi ken o nung pa okatsür densemogo.

"Onoki pa modaktsüner, saka pa angati agibo motettsü. Iba ya onoki o agi nangzüktepogo aser paia interview ka nung shiogo. Anungji iba atema tokteptsü kecha mali. Pa angati agi aotsü tebilemba aliba angazüka ni kanga aoksa liasü," ta AL-Khelaifi-i ashi.

World Cup koker aliba asayar yagi PSG nungi asayaba mapang Ligue 1 titles 6 densema tongtibang asayamung 12 kokogo.

BENDANGLI OSANG : Tapak 7 nungi...

Pakistan PM Shehbaz-i China semdang...

Lenir ana lenisüba kübok aser linük anaprong nungi nürburtem teyari nung Sharif-i China semdangba ajanga takok tulu angutsü aser China-Pakistan tesendaktep nung alizüng tasen atongtsü, ta Pakistan nung aliba Chinese Ambassador Jiang Zaidong-i Hombarnü ashi.

Iba mapang lenirtem tsüngta China-Pakistan tesendaktep indang aroka shisadangtsü aser arok tejangraba ken o jembia linük anaprong tesendaktep aintsü atema blueprint yanglutsü, ta pai ashi.

Linük ana tsüngta rongsenketzung tsütsü tesendaktep tali tejakleni aotsü atema ato kilonser-i totzü, gas, energy, ICT (Information and Communications Technology) aser emerging technologies tsütsü China nunger company ketdangtsürtem ajurutsü.

Sharif-i Shenzen nung China-Pakistan Business Forum nung linük anaprong nungi businesspersons, entrepreneurs aser investors tem den jembitsü. Pai China nung aliba Economic and Agricultural Zones semdangtsü.

BILEMDANGANG

"O tanep agi nisung mulung sunepdaktüsür."